

四庫全書

史部

欽定四庫全書

史部

硃批諭旨卷一百七十六之十一

詳校官尚書臣德保

編修臣裴謙覆勘

總校官中書臣朱鈐

校對官典簿臣郭祚熾

謄錄監生臣范承祖

欽定四庫全書

硃批諭旨卷一百七十六之十一

硃批高其倬奏摺

雍正十年八月初三日兩江總督署理雲貴廣西

總督印務臣高其倬謹

奏為奏

聞事竊查力興國等悖叛及元江四里夷民附和為匪
官兵分路進剿所有進攻剿捕情形臣已節次繕

摺具

奏續據元江府知府祝宏稟報有雲南貴州廣西等
省酌量委署試用之章倫經差往協修攸樂城工
不知夷人謀叛回至思茅相近之慢蚌村村夷突
然變亂章倫正坐罵賊被殺而死等情到臣理合
先行繕摺奏

聞容臣查確再為具

題懇

恩旌獎茲於七月二十九日據總兵董芳稟報帶兵於
七月初十日自把邊江前進中途竝無賊人對敵
惟將沿途山逕窄狹之處俱用木石塞斷隨令兵
練開路而進於十二日已到普洱副將李宗膺帶
兵亦於是日到普守備鄧之姜雲於初十日帶兵
亦經到普普洱及思茅城池俱皆全固賊人退遁
往猛先回竜一帶聞攸樂未有變動其九龍江橄
欖壩之夷人全未隨賊現皆安居各茶山亦未叛

逆刀興國之兄刀定國聞在彼觀望亦未從賊但
雖聞如此而攸樂營員竝無確信到來現於七月
十四日令副將李宗膺遊擊王先陳上志等分帶
官兵一千五百餘員名起身直進攸樂相機料理
將九龍江橄欖壩茶山一帶未從賊之處安撫將
漫蚌等村殺害章倫之處痛加懲創以先斷賊人
後路其猛先回竜一帶為賊潛藏之處今分派遊
擊韓雯鵬等帶兵由問南水箐前往猛先派遊擊

區明等帶兵由磨黑前往猛先於七月十七日起
身各分頭攻勦限於二十日在猛先會合前赴整
岡再分兵圍攻回竜賊巢擒拏賊首殲滅賊衆又
令守備燕鳴春酌帶兵練至倚象猛殆一帶令土
把總召第帶土練至整董一帶堵截後路等語臣
隨一一密示機宜行令總兵董芳悉心料理又提
臣蔡成貴已於七月十七日到新撫地方不日亦
即到普臣井密寄俾其酌量指示各員辦理其元

江一帶之餘賊相近新平恩榮一帶者臣前已遣
令叅將周儀專勦茲於七月三十日據周儀稟報
於七月十八日至漫竜江坡有賊人千餘沿江守
渡連壘石城排柵遮蔽鎗礮卑職一面令人紮筏
一面移行遊擊張瓚等帶領漢土官兵由谷麻渡
口鈔襲賊人之後卑職分派備弁兵練於二十四
日用鎗礮打破排柵賊人抵敵不住督令守備張
接天帶領官兵駕筏搶渡過江奮勇攻勦逆賊勢

窮力竭各棄器械叩頭乞饒查係定南善政二里
所屬上下漫竜等十四村寨夷人共九十八戶令
繳器械暫行交地方官查明分別安插懲處等語
臣隨飛飭恐此一帶之賊尚多仍行詳細查勦務
令淨盡不得遺漏又據遊擊張瓚等稟報於十九
日抵阿墨江細耶渡隔岸有賊拒敵隨令兵丁施
放鎗礮賊人退入土坑躲避高聲喊叫情願投順
現在分別勦撫等語臣查此一項賊人乃元普夾

界地方之賊皆躲聚於此今經搜勦其情形數日
內即可撲除此賊一清則元新一帶即皆寧帖所
有各現在情形臣謹繕摺奏

聞謹

奏

若輩兇苗無故謀叛聚衆興戎以抗拒王師今計窮力
竭方始搖尾乞饒毫無可矜之處官兵既已齊集當乘
勢攻勦以懲創之倘汝度德量力不能操必勝之權將

投順者亦宜審思作何移易之策不可仍令盤踞舊巢
復貽患於將來也切戒因循善柔致於疎縱

雍正十年九月初三日兩江總督署理雲貴廣西
總督印務臣高其倬謹

奏為奏

聞事竊照普思刀興國等悖叛元江四里夷人附和為
逆官兵進剿情形臣已節次具摺

奏明茲據總兵董芳提臣蔡成貴以及軍前副叅遊

守等稟報各路官兵攻殺援勦情形前來臣查賊首刀興國已於那卡地方被遊擊區明拏獲刀興國用刀抹頸傷輕不致傷命業經押解往普竝於南指河拏獲刀興國之幼弟刀經國又於那弄箐內拏獲刀興國之弟刀老五刀老六二名妻二口子一名妹一口竝家人等共十三名其同謀之召第及賊黨等尚未就獲臣隨飛咨提臣就近飭令將備等上緊搜拏必使賊徒罄獲以盡根株其普

思元新之賊現已攻勦將竣理合繕摺奏

聞其善後事宜俟勦竣之日臣與撫臣張允隨提臣蔡

成貴悉心籌畫再行具

奏謹

奏

覽奏知道了善後事宜當再三詳慎為之

同日又

奏為奏

聞事竊查廣西思明土府各寨頭人目無土官不服拘
管土知府黃觀珠自知懦弱不能約束是以詳請
情願將洞郎等五十村寨請歸流官管轄司道總
兵等議詳前來臣商同廣西撫臣金鉷提臣張應
宗會

題請

旨在案今於本年七月二十六日臣接據左江道閻純
璽稟稱據思明同知崔傑稟稱本月初三日思明

土府各村百姓聚集數百餘人執持器械圍繞土府衙署聲稱土官聽信寵役黃瑞卿等審斷不公竟衝入衙署抄洗一空捉出黃瑞卿亂刀砍死土官夫婦逃出南街躲匿又復忽聚忽散聲言五十村寨寧死不肯歸流續據太平府知府屠嘉正稟稱土民不法緣由因土官庸弱有頭目譚道美鄭可傳魚肉小民黃瑞卿潛與勾通以致村民聚衆赴控土署適遇黃瑞卿遂擒住砍殺而各頭目不

樂歸流乘此土民輶鬧之時亦從中唆使聚散不
常等語本道現已遴差前赴探聽確實情形另行
飛報外合先稟明等情到臣據此臣隨即密劄撫

臣金鉷提

臣

張應宗并左江鎮

臣

霍昇就近察實

確情速飭文武酌妥辦理倘須用兵亦即酌撥前
往并密諭隣近各文武加謹防範去後嗣接提臣

張應宗咨已調左江鎮標官兵三百名遣發至太
平府聽副將施善元統領到彼彈壓又接撫臣金

鉅來劉亦已調本標兵二百名星飛前往駐防臣

隨會飭在案續接左江道鈔土忠州稟起釁緣由
前來據稟云卑職確查起事之由皆因官兄監生
黃高朗與姦目黃芳蘭周之賓等不肯歸流稱言
土府與黃瑞卿上省將他們管下各寨賣與流官
遂招集刀萼凍元隴盧各寨姦目星洪等分途傳
集土人約有萬餘於七月初三日進城操戈破街
燒燬羣房男女星散并搜獲黃瑞卿牽出照牆砍

死是日抄搶燒燬共一百餘家後於初十日同知
崔傑崇善縣馮瑚經歷田生玉千總李正會同送
土府回衙各寨土蠻又復鼓噪趕殺各官而各官
拚命奔逃姦目周之賓將土府接入家內居住不
許出門為首者實係周之賓黃芳蘭勢力最大呼
應最靈黃芳蘭僅在家中鳴鐘三次各土兵立刻
即至其餘又在其次又探聞得十八日各亂民要
到各村寨會齊如有不肯附和者勒發銀兩凡官

兵一至必要齊赴救援勿效鄧橫被兵平服等語

臣細按種種不法情節必將首惡等懲創一番將

來方可寧帖度其情勢非曉諭可以了事官役可

以緝拏并非數百官兵可以勦擒者臣即一面密

咨提臣張應宗酌量添兵遴選將備會同地方文

員壓境駐劄并檄令副將施善元相機而行如應

增兵飛即就近呈報提督酌撥去後嗣接提臣張

應宗來劄與臣意見相同已酌定各路漢土官兵

共有二千七百名預為設伏如敢猖獗即行勦懲
今於九月初二日又接左江道稟稱土民初雖烏
合繼亦不無悔心自太平府知府新太協副將於
七月二十九日親至彼地將舊日頭目給牌委用
又於各土民切加開導并聞撫鎮兩標官兵將到
愈加畏懼八月十三日該府協摘取土官印信將
土官押送太平府城各村寨俱安靜無事男婦長
幼咸皆投具情願歸流遵依自後再敢不法願甘

勦除等情隨據太平府屠嘉正新署左江鎮施善
元稟同前由似可不必用兵但又據左江鎮標遊
擊俞大勇稟稱各村土蠻目下雖各具遵依第野
性難測既將黃瑞卿擅行砍殺種種不法豈不自
曉今首惡竝不獻出見官兵源源臨彼揣其情意
似非實肯斂息恐因秋成已屆口糧當收又慮村
寨未固假以抒誠欲以暗築壕塙實難測料各寨
環遶呼應相連安能保其無事等語臣細按各員

稟報再三籌度土蠻如此不法必將為首者懲處
以儆將來方可久安必得官兵在境軍威彈壓方
能使之聽諭遵令此時斷不可撤回且不可抽減
務令首惡悉出方可一面審究撫定辦結臣現將
此意劄寄撫提二臣并行令兩司鎮道各員暨施
善元屠嘉正崔傑照此辦理不許錯誤所有情節
謹繕摺奏

聞伏惟

睿鑒謹

奏

覽所畫機宜俱是事關土蠻恃衆極須慎重辦理

雍正十年九月二十二日兩江總督署理雲貴廣

西總督印務臣高其倬謹

奏為奏

聞事竊查普思元新夷賊勾結悖叛臣已將調兵分勦

情節節次繕摺具

奏茲普思搜勦賊首一路之兵前經遊擊區明已將賊首刀興國及其子妻與其弟拏解續據區明報稱刀興國在途傷發身故隨割首級并各賊眷解省今已將到續又據遊擊陳上志稟報搜至圈羅擒獲賊黨胡尚文及其兄弟妻子又招出蠻竜村男婦大小八十三名口搜至整空擒獲刀三家人據供刀三逃在六困地方現帶兵前往搜拏等語其勦撫威遠以外賊人一路之兵臣據遊擊張超

稟報行至蠻住殺死拒敵賊人數十名招出魏科等一十八寨各令安業又在窩羅寨蠻簡三臺坡殺傷賊衆直抵三圈投出蒲蠻猓黑二十四寨將賊首四喇鮐用弩打死割獲首級此一帶勦撫之事已竣業撤兵回威遠駐劄等語其援應攸樂一路之兵臣據遊擊王先報稱帶兵經過蠻罵河關鋪關坪板角等五處俱有賊人拒敵我兵奮勇進攻沿途殺死賊人甚多於八月十九日將至攸樂

對山有賊人千餘匿箐放弩官兵鎗礮齊發打死
逆賊數十名有攸樂官兵前來接應砍開木柵四
道於未時到攸查攸樂柵城官兵俱各完全又據
守備張接天稟報沿途四次與賊對敵傷賊甚多
攻破木柵無數亦於八月二十一日已到攸樂其
茶山各寨據王先稟稱窩泥苦慈蒲蠻俱已作逆
惟擺夷尚在觀望其九龍江外車里土司之地卑
職遣把總李燦將奉發告示及與宣慰刀紹文公

文交該弁齎持前往旋據李燦帶領宣慰主文鄒
文蔚打鑼土弁召者叭目先慙杭等到營稟稱把
總等到九龍江將公文告示交兵丁王大成一面
投交宣慰土官隨有土千總刀細悶納即來江口
迎接至宣慰刀紹文處有宣慰刀紹文稱伊身幼
弱所有伊下之土目或不法通同叛夷或推延不
聽調遣屢逼伊母子通同賊人伊母子不聽煽惑
抵死不從伊下之土目惟土千總刀細悶納盡心

竭力固守九龍江內抗諸目外拒賊人等語卑職
查係確情俱經分別獎賞又宣慰刀紹文懇求官
兵往江邊駐劄以為聲援彈壓卑職隨令守備張接天
帶領兵練前赴九龍江彈壓卑職在攸率領弁兵
一面將圍攻攸樂之逆賊嚴加攻剿一面曉諭橄
欖壩附近夷人再刀興國之兄刀定國已經守備
李萬鵬拏禁合併聲明等情臣即飛行王先飭令
速行相機辦理叛逆者痛加懲創觀望者曉諭招

撫其宣慰刀紹文深明大義土千總刀細悶納矢
心忠勤盡力把江抗賊臣俱現發給重賞以示鼓
勵其勦撫元普兩界中賊人一路之兵今各里夷
寨勦撫已竣惟曾經附賊為逆之火頭豐阿常等
四人尚鑽箐藏匿不出現在躡捕其六里人民今
俱已復業矣至新平楊昌禮等通同普思之賊叛
逆臣已調鶴麗鎮總兵楊國華總統所調各處官
兵星飛攻勦今接據叅將周儀吳朝應報稱在鮐

馬密殺死賊人數十名賊衆敗退至密白哨搜獲賊人男婦大小一十五名口在怕之勒投出被脇夷人男婦大小百餘人追至阿者山梁遇逆賊千餘恃險拒敵官兵奮勇攻破木柵三道連踏賊營二十餘座殺死賊首楊登科一名又據知府佟世廕稟報率同官兵在猓黑達拏獲賊人二名即直抵新化擒獲賊首普占春之長子普之傑姪普之英及賊眷十九名口又分兵直趨象山有賊五百

餘人在山拒敵官兵奮勇直上賊不能敵舍壘奔
逃生擒男婦大小四十七名口活拏賊人一名施
老三又據守備胡大勇等稟稱帶兵至黑龍坡有
逆賊數千與官兵對拒我兵奮勇當先短兵相接
斬賊首級四十餘顆鎗礮打死賊人三百餘名賊
人大敗我兵直抵寶秀又分兵三路進至紅岩賊
衆聚有三四千守備等率兵進攻追至山海子大
腦打傷猱賊數十名賊人滾箐逃遁隨於阿花寨

搜出賊黨男婦五十六名口又在磨些衝大松嶺
打死逆賊數十人有夷獍一百餘戶投出隨令各
歸安業又據叅將鄭文煥報稱帶領兵練至石屏
之巴窩地方遇賊千餘我兵分為兩路夾攻殺敗
逆賊砍獲賊人首級十二顆活擒十三名又據遊
擊白天佐報稱帶兵至賴子塘地方有獍賊千餘
吶喊拒敵弁兵奮勇連戰三次殺死逆賊無數跟
追至界牌有駐防界牌千總劉瑞彩等帶兵夾攻

斬獲賊首三十餘顆又據守備謝章稟報令把總
楊起鳳等遊巡至蠻拱坡遇猓賊六七百人我兵
鎗礮齊發打死穿黃衣騎馬賊首一名砍獲首級
直追過嶺打死猓賊二十餘人又據遊擊段福報
稱領兵至洗魯遇賊擊敗又據遊擊王廷標稱帶
兵至祿鴉尾擊敗賊人數百殺死甚衆又於九月
二十日據鶴麗鎮總兵楊國華報稱賊人經官兵
勦敗今據新平土目普應祥等稟報已將賊首楊

二皮斬首又張保將賊首摸則草父子俱行斬首
又據遊擊郭佑民稟報已拏獲賊首金名芳又據
總兵董芳稟報賊首李世蕃帶後生前來元江軍
前投誠等語又據把總陳義文等稟報於南蘊村
勦敗賊人斬獲賊首李阿白首級并擒獲賊人隊
長普老二等一十三名又據知府佟世廕驗報帶
兵搜勦新寨之賊已獲賊首李本龍腊子龍標三
名及其妻子家口一百四十餘名口又守備楊旭

已獲賊四百巴等語臣查新平賊人已經各官兵
痛勦屢次大敗之後業俱散潰潛逃所有大賊首
已獲九人其楊昌禮等數名臣飭將備上緊搜
擒現今情形普思之賊首已獲普洱思茅攸樂三
城已全新平之賊又已散敗追搜擒捕不日可竣
臣俟新平之賊首普洱之賊黨所未獲之數人一
經搜獲即將一切料理調劑俾永遠寧帖之處詳
細籌思條列具

奏請

旨敬謹辦理所有現在情節臣謹繕摺奏

聞謹

奏

據奏普思賊首已獲餘黨現在搜捕計日可以竣事等語但思夷獠犬羊成性反覆無常今茲勦撫務須窮源拔本勿使餘燼復燃凡夷人內知大義能不被賊煽惑者及隨軍効力者極宜厚加賞賚或題請恩錫以示鼓

勵豈可吝惜小費辜其向化之心此番行間官兵奮勇
效忠甚屬可嘉其中勇往向前拚命拒敵並臨陣受傷
及已故之各員弁士卒俱應從優賞卹又如罵賊被害
之試用章倫更應題叙旌獎昭示勸懲可將前後用兵
勦賊以及奏捷情節暨分別加恩錫賚之處繕疏具題
候朕降旨施行前數次奏摺槩未交部汝其知之

同日又

奏為奏

聞事竊查黔省新開苗疆內之九股地方前經

題定安營駐兵經撫臣張廣泗會商令按察使方顯

會同清江鎮臣趙文英料理續經臣與署撫臣元

展成提臣哈元生商定於本年七月十六日令帶

官兵二千餘員名起身前往臣已具摺

奏明今於九月十六日據總兵趙文英按察使方顯
等報稱官兵已抵現建城之台拱地方於初到之
時苗民伏道迎接似甚恭順詎於九月初六日夜

有桃賴等寨兇苗約萬餘人圍營發喊放鎗經官
兵擊退平明猶未解散職等分撥官兵三路齊出
將近營首逆之楊翁寨攻破焚其寨柵斬殺無算
我兵亦有帶傷惟是九股地險寨衆現在行營官
兵不敷調遣已飛調鎮遠等營兵丁五百名再調
撥兵丁二千名前來以資遣用等語同日又接署
貴州撫臣元展成札稱於十一日據清江鎮報請
調兵因軍機緊急滇黔隔遠不及候檄已飛調本

標及提標等營兵丁二千名派撥弁員統領星速
前赴台拱等語臣當即照署撫臣所撥兵丁員弁
飛飭各協營隨帶火藥鉛彈及一切行軍器具星
飛前往台拱又檄飭貴陽都勻二府飛調定番廣
順樂弩手土兵五百名爛土司麻哈宣威土兵五
百名前往台拱聽候遣用并飛檄趙文英方顯會
同揆度情形酌合機宜辦理勦定此外仍令各相
近之處預備官兵臣查苗人情性聚衆皆各自帶

米食用十日半月之後米糧食盡即各散回本寨
不能久聚一處官兵乘其食盡散歸之時則攻勦
更易為力臣又飛飭趙文英當苗人初集氣銳之
時稍緩擊以老之棄其糧盡勦之再鄰近台拱地
方四面皆係新闢苗疆恐各處苗人聞風煽動最
宜密察嚴防臣又飛飭各新疆文武十分用心密
加防範不可一毫疎忽再者臣前因貴州提臣哈
元生奉

旨進京署提臣霍昇尚未到黔臣已於九月初八日飛

咨署撫臣元展成將提督印務暫為署理今據報

九股苗人抗拒不法臣又咨元展成提篆前已咨

送暫署即可并行調度辦理又據霍昇驗報已於

九月初三日卸事起身約計九月二十五六日可

以到黔臣謹將情節繕摺奏

聞謹

奏

奏中既稱苗人初集氣銳之時應緩擊以老之俟其糧
盡散歸攻勦甚易又稱隣近台拱地方四面皆係新闢
苗疆恐各處苗人聞風煽動最宜密察嚴防等語果如
所言各處苗人有聞風煽動情狀愈當速振兵威破其
姦謀諺云迅雷不及掩耳正此之謂寧容緩耶二語似
屬大相矛盾况從來兵貴神速遲則變生又添枝蔓且
恐在事將弁借此任意遷延殊與行師之道甚不相協
未知汝具何意見朕頗憂之但遠隔萬里彼地情形朕

未獲身經目歷不過就事論事非必以為然總在汝相機籌酌向允妥處辦理可也特諭

雍正十年十一月二十九日兩江總督署理雲貴廣西總督印務臣高其倬雲南巡撫臣張允隨謹奏為仰懇

聖恩事竊查雲南學臣吳延熙到任試士以來辦事勤慎考試廉明而於教訓士子讀書為文之外尤於立心行事加意告勉諄諄不倦士子之為非者又

不袒護實於邊方有益且係接前任學臣于廣之
差在滇辦理僅有年半臣等愚見冒昧仰懇

聖恩乞將吳延熙

賞令在滇訓士為日少久似於士習有裨臣等謹會同

繕摺奏

聞謹

奏

此奏未到之先已有旨矣不便再更

雍正十一年六月二十四日兩江總督臣高其倬

謹

奏為奏

聞事

臣

於雍正十一年五月二十六日到江寧接印任

事業經繕疏

題明現在江南上江各府及下江之江寧府鎮江府
雨水調勻稻苗暢茂餘蘇州等府稻田現皆車水
灌溉稍望雨澤上年下江之松江蘇常等府所屬

常熟華亭等縣內有被災之處仰蒙我

皇上蠲賦給賑又截漕平糶更復

特諭加賑四十日并嚴飭地方官加意辦理被災之民

仰賴

皇仁皆得全活其流出在外者今已復歸安堵初夏麥
又有收甚資接濟惟上江之泗州壽州宿州泗州
衛穎上霍邱二縣下江之海州徐州山陽阜寧安
東青河沭陽贛榆豐縣沛縣宿遷桃源等縣地方

四五月間各據報有蝗蝻生發即經署督臣魏廷

珍分頭檄飭各屬員設法上緊撲捕務令淨盡隨

據各屬報已撲盡各具結送查臣到任後又各據

報撲捕已淨臣恐設有不實即致貽患隨又一面

嚴飭搜查捕打一面分遣各員分頭馳查以考虛

實倘有未淨亦即令在彼督同撲打其不力不實

之員即令揭報嚴叅現據各處所報蝗蝻俱已撲

滅惟沛縣地方五月二十七日據報尚有蝗虫而

從前沛縣各員所報則稱蝗自山東魚臺縣而來而山東各員則又報蝗在沛縣撲打乏員等語前經臣魏廷珍逕行魚臺縣令協力淨捕而河東督撫亦咨明江南督撫俾嚴飭沛縣實力撲捕在案臣到任後隨又咨覆凡各省屬員陋習未經撲捕先為推卸之地在江南者則推之山東而山東之員亦推之江南惟有各加嚴查嚴督所屬各員凡就近生蝻不論何處盡力撲打毋分彼此方不致

貽惠臣又於馳勘各員外再飛委蕭縣知縣溫長
發就近飛往協幫並令懸賞購捕倘少不實俱即
嚴叅臣看現在情形各處之蝗已息獨徐沛二處
未淨再淮安府屬雖報撲淨未可放心臣現在嚴
飭緊辦以期實在淨盡所有情形理合繕摺奏

聞謹

奏

前諭魏廷珍甚晰蝗蝻倘至為災任汝百計支飾究不

能辭其咎也

雍正十一年九月十六日兩江總督臣高其倬謹

奏為奏

聞事

臣

查今歲江南六月間稍旱前經具摺奏

聞續於七月間得雨但各處遲早不等是以同在一州

縣之中年成或收或歉不同即在一圖一保之中

此上彼下不一其年成必詳查細看方得確實今

詳查得上江安慶太平廬州鳳陽等府和州潁州

亳州等州俱八分收成徽州寧國池州等府滁州
六安等州俱七分收成惟廣德州貴池旌德建平
合肥等五州縣前經報旱續經得雨俱獲五分有
餘收成其被旱者不及一分勘不成災又宿州泗
州靈璧虹縣七月內黃河之水洩出田稍被淹宿
泗虹三州縣甚輕靈璧稍重查上江惟此處應稍
調劑臣現籌動存公之項預計接濟與撫臣徐本
商同料理其下江淮揚徐三府收成俱九分八分

內揚州府屬江都泰興二縣之沙田因江水漲損
圩圍稍有被淹徐州之沛縣亦稍被水俱分數至
少其江寧蘇松常鎮太倉通州等府州俱有七分
六分有餘收成內蘇屬之吳縣崑山新陽常熟常
屬之武進荆溪鎮屬之丹徒丹陽金壇溧陽松屬
之華亭奉賢上海南匯青浦福泉太倉屬之鎮洋
嘉定寶山崇明俱報被旱及被風細查不及分數
俱有五分以上收成

臣查此等下江各州縣雖內

有乏收之田被旱不及分數民間雖有報勘之呈
不應開其冀倖之習所有歲額應照舊徵收惟是
熟歉不勻各圖之中既有乏收之家又有上年被
潮今又稍旱之處現在秋成之際米價未減將來
青黃不接之時市價必昂應加意調籌預思接濟

臣自松回過蘇州與署撫臣孫國璽商酌所有除

前籌買運楚米之外其各州縣每處應買補足二
萬石之穀雖已經發銀飭買但以四錢五分一石

限定銀數又限令其買穀則州縣之中謹慎者不敢增價通融蒼猾者更托稱價值不敷帶銀回貯則來年平糶各處倉穀前經用空今又未補必致無可糶濟臣等現已行令即彼地穀價稍貴亦即增價購買臣等仍不時查察不令浮冒并令買運之處米穀不拘將來即以原價平糶既可接濟民間亦可不虧價本倘此內有平糶尚屬不敷之處再行酌撥隨時運添其江西各府屬今歲收成俱

有八分七分不等內被水者共十一縣今勘查有
新淦峽江吉水永豐崇仁南昌豐城七縣成災業
經

題請緩徵併請照分數蠲免勘不成災者大庾清江
宜黃樂安等四縣臣現會酌批動存公銀兩酌宜
撫恤又有續報之新建等十六縣或山水衝刷或
江潮漲發俱有被水細查今或已收穫或已補種
俱不成災臣亦已令酌宜撫恤并預備平糶接濟

務使安定所有情節一併奏

聞謹

奏

覽奏知道了加意撫恤務俾災黎無至失所

同日又

奏為奏

聞事

臣

查看松江海塘業經

題明

臣

於九月初二日抵上海縣地方將新築土塘

逐段親看於初五日看畢所有塘工修築俱各堅固惟原估塘頂寬二丈二尺塘腳皆寬五丈已為寬濶但細看尚覺微陡應再酌培外面塘根令成走馬坦坡則根基愈厚捍禦海潮愈為有力應俟每畝五文之錢徵收稍積再酌於歲修加倍至所有石塘臣亦逐段親查其已完工者甚屬堅固其現做工者俱完及七分六分五分四分不等其未做工者俱現釘椿木等候石料興工臣查詢工尚

未竣情由據

臣

俞兆岳

臣

張适移咨及面說通共

應築石塘四千六百三十四丈已築完石塘三千九十四丈未築石塘共一千五百四十丈零此工原

題於雍正十一年內修竣因各辦石之員買運遲緩俱不足原議之數現在停工待石今將遲延各員咨叅并咨請

題明展限又原定修築石塘用黃石六分青石四分

今黃石採取甚艱應請改用黃石四分青石六分
以速工程又原經

題定於石塘兩頭各添石塘一百丈今海潮形勢改
移石塘東頭之華家角沙長潮遠而石塘西頭之
金山墩漆家墩海潮逼近形勢頗險應將華家角
之石塘一百丈改建於金山墩漆家墩一帶再有
尚未建之石塘一百一十九丈今金山墩漆家墩
一帶潮勢既險亦應移之添建於此一帶又金山

墩之運石小河與上浜之大河俱應速行挑挖則
石料運載無阻等因臣查海塘關係緊要竣工不
能如期所有辦石遲誤各員臣另行

題叅外至採取黃石臣經細查現在實屬不能多得

黃石

青石之分已屬不鮮而黃四青六之說更不可解

從何

批諭耶

應改用黃石四分青石六分工程始能速竣查現
在所有應建之石塘尚須黃青石共十萬餘丈臣

隨一面加委辦員發給銀兩另令開採青龍山戈
家山之石以濟工用一面將原採之各山俱添派

幹員或令協辦或令督催限期定數務令上緊趨行多辦遲者立即叅懲其運石小河及上浜河臣飭司動項委員著落趕挑俾運石無誤至華家角之一百丈石塘及未做之一百一十九丈石塘移建於金山墩漆家墩之處臣到彼細看潮勢之緩急沙脚之遠近現在情形應行移建再應於華家角添修土塘一段接連現在土塘更為週密其石塘外之外護土塘原築頗有稍低稍墊之處經臣

尹繼善令其加修續又經臣喬世臣令通行加培
增高二尺今臣查看現在培築尚未完工已嚴飭
蘇松道王澄慧上緊催趲即令完工不許再緩惟
是臣細看此土塘塘身稍為直陡仍應於歲修厚
培走馬坦坡更為堅固此內現在去水太近者十
餘處臣已指令目下即行添培併說與俞兆岳張
适就近查督務令如式所有改移石塘工段請用
青六黃四石料及酌請展期之處臣亦另行具

題請

旨外臣謹先將各情節繕摺奏

聞謹

奏

覽

雍正十一年十一月初六日兩江總督管理蘇州

巡撫事務臣高其倬謹

奏為詳察地方情形仰懇

聖恩事今年江南江寧蘇松常鎮五府通太二直隸州
所屬各縣收成稍薄淮揚徐三府中亦有一二屬
縣稍稍被水秋冬之際民間米價未減將來青黃
不接之時米價恐必昂貴應預行籌備平糶之米
穀以平市價以濟民食臣將情節業經繕摺奏
聞正在辦理間接准總漕臣魏廷珍字寄近據屬員報
稱今年天時稍旱民間所收米粒細小無多青腰
白臍間雜田中祇有此種者有司亦難分別擇收

可否

奏請截留亦接濟平糶之一策等因札商前來臣查江南地方人口最衆食指極繁今春各處平糶動用過常平均貯兩項米穀及楚省運來之米共二十萬八千餘石尚屬不敷仰蒙

皇上天恩截留漕米四十萬石除賑濟用米九萬一千餘石盡行添入平糶市價始得稍定民食賴以得充今查常平等項米穀雖現在遣員往楚買補但

聞彼處米價亦未甚賤竊恐未能全數買回則將
來平糶之需必須詳細預計有備無缺方足接濟
況今年民間所收又有米粒細小及青腰白臍難
於擇收之處可否將應運漕米截留三十萬石以
濟平糶之用謹具摺請

旨伏候

聖裁再今年下江地方去年緩漕及歷年舊漕仰沐

皇仁悉准折徵業已淪肌洽髓茲據布政司會同糧道

詳稱蘇松等屬雍正十年緩漕共計三十餘萬石
上年潮水泛溢今又收成稍薄民間不無竭蹶輸
將且本年應徵地漕銀米並雍正十年所緩地丁
及各年舊欠錢糧均應於今歲秋成後併徵於歲
內全完自十月至十二月計期三月一時民力恐
難兼顧今似應請將十年分緩漕於十一年冬徵
收一半其餘一半緩至甲寅年冬帶徵完納以舒
民力等語臣查所詳情形是實今一併繕摺請

旨倘蒙

聖恩俯准施行則民力民食均荷

皇仁益更寬裕矣謹

奏

江南今歲情形朕業經悉知已降有指示汝等酌辦之
旨汝當凜奉欽遵莫視功令同兒戲也

同日又

奏為查明奏

聞事松江海塘臣查看之處前已具摺奏

聞其查叅辦石遲延及設法趲修之處臣已現具疏

題明茲據臣張迺稟稱附貼石塘之土塘工程原定

每土一方給發工價銀共九分加夯礮緊貼石塘

堅築張迺到工之後經確查各號土塘俱用浮土

堆積竝未夯礮每方止給工價銀五分有零俞兆

岳先築樣塘各工員俱照俞兆岳兩號樣塘辦理

其椿木亦有多餘價值現細加查察核實報明等

語臣正確查隨據太僕寺卿俞兆岳咨開石塘內之貼附土塘本寺惟恐塘身單薄不足以資捍禦塘面二丈加寬至四丈塘脚四丈加寬至六丈四尺加增土方之費咨請在歲修捐錢項下開銷本寺東西樣塘共二百九十餘丈應加增土方銀約五百餘兩本寺已經捐資補足無庸再給又咨稱椿木盈餘銀二百九十餘兩等因臣查俞兆岳身任總理自應潔已無私實心督率乃土塘未加夯

礮竟有浮多之銀今稱加寬之應領銀五百餘兩
捐資補足無庸再給此項銀兩及採辦樁木盈餘
銀二百九十餘兩不行早為報明聞查始報甚屬
可鄙臣謹據實奏

聞至在工承辦各貼塘之員其土方餘出工價之處臣
查詢俱稱所有土塘未加夯礮多餘土方之銀現
俱尚存司庫未敢支領竝未侵冒臣現飭附貼土
塘工程緊要難任浮鬆即令以多餘未領之銀仍

照原議飭令張迺督令各該員另行拆開照例夯
礮堅固如重加拆修此銀不敷各員雖未侵冒亦
未先報出應俱罰令各該員賠出添補修築再查

承築人員內有張德盛已經身故沈慶元緣事叅

此等人員豈可任其逍遙事外

草趙崑理咨部另補俱已離工此三員工程雖亦

照俞兆岳所做樣塘承修但未經奏銷俞兆岳即
聽其離工應著落俞兆岳名下代為拆改重築臣

查俞兆岳從前督修石塘甚為悉心勤力近年老

精神少衰海塘工程緊要現已竣工遲誤此係江
省要工臣不委之俞兆岳謹自一一籌酌督率同
張适上緊辦理期務早竣工堅費實至土護塘及
此外有無浮冒之處亦令張适實力嚴查臣亦加
意查察如有侵蝕情弊即行指明

題叅所有查明及辦理情節臣謹先行奏

聞謹

奏

俞兆岳年力衰邁督辦遲誤各情形朕未身經目歷無從而知在汝秉公據實酌宜措施耳如應衆劾具疏指叅至於張造乃向日所悉險邪小人若深相倚信專委辦理倘異日被伊連累毋謂朕言之不早也

同日又

奏為奏

聞事

臣

查江南修船一節久成錮弊

臣

前在江南議定

題請就近分廠當修造之際即為查催驗看其揚廠

移至江寧聽總督查驗淮廠聽總漕查驗蘇廠聽
巡撫查驗鎮廠聽將軍查驗松廠聽提督查驗冀
除積弊臣尹繼善亦以江南船工往例於部價之
外給有一五協貼每部價一百兩協貼一百五十
兩內河沙唬等船在大修小修協銀儘數而拆造
之船頗有盈餘至外海繪舩等船各員稱拆造僅
可敷用大修小修協銀尚有不足等情飭行據實
修造節省并准將在廠辦理經役之食用以及管

船捕舵之房飯錢均於節省項下據實動支開報
俟核定盈縮確數量與裒益因各委員所報節省
參差不齊未經核

題是皆因船工積弊力思整頓然文武各員弁及兵
胥行匠久成一片膠結已深究未徹底清釐臣今
再四思維現將各項船隻按趕繒沙唬吧唬之各
樣及拆造大修小修之各項俱各調一樣船至蘇
廠親查親看遴委可信廉潔勤慎之文武員弁照

實辦料照實計工一一成造各船一竣則工價俱
有成規可循然後照此定議工價一例遵行以定
畫一成規嗣後上司無庸批減修員亦無可詳增
既有一定之數無可浮開再嚴稽查之法不許尅
減一有違誤嚴叅賠懲庶船工可期實在料理亦
有定程矣

臣謹將情節繕摺奏

聞謹

奏

調船至廠看造亦不過小試行道之端耳焉能徹底清釐夫木料價值歲有低昂工亦時有貴賤俱難預定且汝現今酌議之數未必即可永遠遵行而乃云嗣後上司無庸批減此一語自為日後省心省力張本則善矣若謂為國家清釐積弊則朕不知也總之凡事惟有實力辦公四字方免罪責此外別無良策

雍正十二年三月初六日總督管理蘇州巡撫事

務臣高其倬謹

奏為恭謝

皇上嚴切

訓飭之

深恩實陳微臣痛自省改之下悃仰祈
睿鑒事竊臣節次

奏摺內欽奉

硃批詳

訓嚴飭多方

指示字字警誠在在提撕仍施

教誨之

恩俾以自新之路臣跪讀之下感激涕零臣之愚昧錯謬自容無地自愧難安惟有切切敬記

聖訓刻勵自心期念念誠實事事公忠不但斷斷不忍竟昧天良少存絲毫歸過之念巧飾之心即從此有一毫自全自便之念畏勞畏怨之心亦即屬上孤

聖訓下昧本心何能逃

日月之照

國法之誅此是臣犬馬實情謹繕摺仰謝

訓誨深恩自陳改勉下悃伏祈

睿鑒謹

奏

覽之厭矣

雍正十二年五月二十二日蘇州巡撫臣高其倬

謹

奏為奏

聞事

臣

查江南上年淮徐一帶及江寧通州等處蝻子

生發經悉力撲滅但恐蘆洲及草灘僻處遺子或

時發生

臣

於今年三月即預飭各道府州縣時時

細查一有萌動即悉力上緊撲打務令打淨不許

疎漏茲

臣

陸續據江寧揚州淮安徐州等府所屬

之各州縣俱報稱蘆洲草灘蝻子生發有席片大

數處者有一畝半畝一二塊者惟泰州分司所屬之梁梁場東臺場草地內間有寬數畝者然皆逼近海邊向不種植禾稼之處俱稱極力撲打臣隨分差各員分路查督現俱稟報業已撲打刨坑趕埋火燒鴨食悉已撲淨無遺具結前來臣又令布政使白鍾山分派試用各員即令分往各府州令其專司查勘督催總之蝗蝻為禾稼巨害臣務必悉心極力料理防撲斷不使為害近又連得大雨

俱皆普遍不但於禾稼有益即蝻子亦不萌發所
有情節臣謹繕摺奏

聞謹

奏

蝗蝻撲滅之說難可準信倘於此等處再涉欺誑不實
則高其倬禍不旋踵矣悉心竭力料理與否任汝自為
之

雍正十二年六月二十六日蘇州巡撫臣高其倬

謹

奏為奏

聞事江蘇各屬地方自春入夏晴雨調勻二麥有收稻

已插蒔情形

臣已繕摺

奏明六月初間栽插全竣正資雨澤灌溉自初一日

即沛大雨頗為應時但自初一至初六日晝夜大

雨自初九至十一日又復連綿雨水過多

臣一面

飛行遣員分頭查看各屬亦各報有雨水過大淹

浸禾苗之處臣復飭令詳看確查今查得各處高田禾苗甚好其中田禾苗亦好將來俱可望豐收惟最低被水浸過禾頂之田已經連日晴霽有即露出禾頭者亦屬無妨只有現尚未露頭之田禾勢必有損然天時尚可補插及補種各種雜糧亦可望有收臣現分頭委飭令各委員與地方官督率勸導令各民或培圩堰或行疏洩竭力車戽又飭或酌借倉穀以資食力或令業主量行借助俾

佃戶力作以期補種臣就大槩而看如句容常熟
昭文新陽陽湖江陰無錫金壇泰州崇明通州境
內一二最低之區圖似水退之勢稍遲稍難其餘
上元江寧宜興靖江等縣雖經報水俱屬無礙現
在嚴飭令其盡力戽水補種臣惟有悉心調劑將
來如果有積水難消不及補種者另當查確奏

聞請

旨遵行至於江寧省城內外以及各屬間有被水衝倒

房屋已查明實在無力修整窮民量為資助城垣
營房墩臺間坐偶有淋損之處勘明修理礮岸沙
土坍入河內有關運道者分別修濬統俟次第料
理另行奏

聞外所有委員查勘雨水情形并辦理緣由理合繕摺
奏報謹

奏

高其倬巡撫江蘇安望免旱澇之虞覽所奏雨水各情